

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савјет*

**RJEŠENJE**  
**o koncentraciji privrednog subjekta Nova Ljubljanska banka d.d. Ljubljana i**  
**privrednog subjekta Razvojna Banka a.d. Banja Luka**

**Sarajevo**  
**decembar 2006. godine**



Broj: 01-02-26-17-9-II/06  
Sarajevo, 15. decembar 2006. godine

Na osnovu člana 25. stav (1) tačka e), člana 42. stav (1) tačka d) i člana 43. stav (2), a u vezi sa čl. 12., 14., 15., 16. i 18. Zakona o konkurenciji (Službeni glasnik BiH, broj 48/05) i člana 193. stav (2) Zakona o upravnom postupku (Službeni glasnik BiH, broj 29/02), a po Zaključku o pokretanju postupka po službenoj dužnosti, broj: 01-02-26-017-II/06 od 26. oktobra 2006. godine, za ocjenu dopuštenosti koncentracije privrednog subjekta Nove Ljubljanske banke d.d. Trg Republike 2, Ljubljana, Republika Slovenija, i privrednog subjekta Razvojna banka Jugoistočne Evrope a.d. Banja Luka, Kralja Petra I Karadorđevića 85a, Banja Luka, Bosna i Hercegovina, Konkurencijsko vijeće na 37. (tridesetsedmoj) sjednici održanoj dana 15. decembra 2006. godine, je donijelo

### **R J E Š E N J E**

1. Ocjenjuje se dopuštenom koncentracija nastala na tržištu bankarskih i finansijskih usluga Bosne i Hercegovine sticanjem većinskog vlasničkog učešća u privrednom subjektu Razvojna banka Jugoistočne Evrope a.d. Banja Luka, Banja Luka od strane privrednog subjekta Nova Ljubljanska banka d.d., Ljubljana, Republika Slovenija.
2. Zbog nepodnošenja Prijave namjere koncentracije u zakonom predviđenom roku, izriče se novčana kazna privrednom subjektu Nova Ljubljanska banka d.d. Ljubljana u visini od 400.000,00 KM koju je dužan platiti u roku od 8 dana, od dana prijema ovog Rješenja.
3. Ovo Rješenje o koncentraciji upisuje se u Registar koncentracija.
4. Ovo Rješenje je konačno i biće objavljeno u Službenom glasniku BiH, službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je zaprimilo Prijavu namjere koncentracije privrednog subjekta NLB Razvojna banka a.d. Banja Luka, dana 03. aprila 2006. godine, broj: 01-02-26-003-II/06 kojom privredni subjekt Razvojna banka a.d. Banja Luka - NLB Group namjerava preuzeti (pripojiti) privredni subjekt LHB Banka a.d Banja Luka.

Konkurencijsko vijeće, nakon izdavanja Potvrde, podnositelju Prijave, o urednoj i kompletnoj dokumentaciji u vezi Prijave namjere koncentracije, je donijelo Zaključak o pokretanju postupka (broj: 01-02-26-003-4-II/06 dana 21. juna 2006. godine), u smislu odredbi Zakona o konkurenciji.

U toku postupka ocjene dopuštenosti predmetne koncentracije Konkurencijsko vijeće došlo je do saznanja da je prije predmetne koncentracije provedena transakcija kojom je privredni subjekt Nova Ljubljanska banka d.d. Ljubljana postala većinski vlasnik privrednog subjekta Razvojna banka Jugoistočne Evrope a.d. Banja Luka, i koja nije prijavljena Konkurencijskom vijeću, iako je postojala obaveza u skladu sa odredbama Zakona o konkurenciji (u daljem tekstu: Zakon).

Pravni osnov provedene koncentracije je Ugovor o kupovini akcija potpisan, dana 27. jula 2005. godine, između privrednog subjekta Nova Ljubljanska banka d.d. Ljubljana (u daljem tekstu: Nova Ljubljanska banka) i privrednog subjekta Razvojna banka Jugoistočne Evrope a.d. Banja Luka (u daljem tekst: Razvojna banka).

Na osnovu navedenog dokumenta i provedenih predhodnih analiza Konkurencijsko vijeće je donijelo Zaključak o pokretanju postupka po službenoj dužnosti (u daljem tekstu: Zaključak), dana 26. oktobra 2006. godine broj: 01-02-26-017-II/06, sa ciljem ocjene dopuštenosti provedbe koncentracije, u smislu člana 16., a u vezi člana 18. Zakona.

Konkurencijsko vijeće je, u smislu člana 33. stav (2) Zakona, od učesnika koncentracije Nove Ljubljanske banke, privrednog subjekta koji je bio u obavezi prijaviti koncentraciju, zatražilo podatke i odgovarajuću dokumentaciju na osnovu koje treba ocijeniti pozitivne i negativne efekte predmetne koncentracije na tržištu bankarskih i finansijskih usluga u Bosni i Hercegovini. Na osnovu dostavljenih podataka Konkurencijsko vijeće također, u smislu člana 17. Zakona, treba ocijeniti efekte provedene koncentracije na strukturu relevantnog tržišta sa ciljem utvrđivanja da li je predmetna koncentracija stvorila ili ojačala dominantni položaj koji za posljedicu može imati značajno narušavanje tržišne konkurencije, u smislu člana 13. Zakona.

U predviđenom roku privredni subjekt Nova Ljubljanska banka je dostavila traženu dokumentaciju i odgovor na predmetni Zaključak. U odgovoru privredni subjekt Nova Ljubljanska banka je naveo da predmetnu koncentraciju nisu prijavili iz razloga što u vrijeme vođenja aktivnosti u vezi ove koncentracije po Zakonu o konkurenciji («Službeni glasnik BiH», broj 30/01) nisu bili u obavezi prijaviti koncentraciju. Takođe je navedeno da u vrijeme zaključenja Ugovora između učesnika ove koncentracije Zakon nije bio objavljen u Službenom glasniku Republike Srpske, iako je trebao pored objavljivanja u Službenom glasniku Bosne i Hercegovine, i radi toga nisu imali informaciju da je usvojen novi Zakon o konkurenciji. Takođe privredni subjekt Nova Ljubljanska banka u odgovoru ističe da predmetna koncentracija, s obzirom na tržišni učešće, ne može imati negativne efekte i znatno narušiti tržišnu konkurenciju na relevantnom tržištu bankarskih usluga. Na osnovu ovih i drugih razloga, navedenih u odgovoru, ukoliko se utvrdi postojanje odgovornosti za neprijavlivanje koncentracije privrednog subjekta Nova Ljubljanska banka predlaže da se navedene okolnosti uzmu u obzir za oslobađanje od novčane kazne u skladu sa članom 3. stav (2) Odluke o proceduri oslobađanja odnosno ublažavanja od kazne («Službeni glasnik BiH», broj 15/06).

Konkurencijsko vijeće u postupku ocjene koncentracije je utvrdilo sljedeće:

## **Pravni okvir ocjene koncentracije**

### **Zakonski okvir**

Konkurencijsko vijeće u sprovođenju postupka ocjene predmetne koncentracije je primjenilo odredbe Zakona o konkurenciji, Odluke o utvrđivanju relevantnog tržišta («Službeni glasnik BiH», broj 18/06), kao i odredbe Zakona o upravnom postupku («Službeni glasnik BiH», broj 29/02) u dijelu koji nije ureden odredbama Zakona.

Budući da se predmetna koncentracija provodi u sektoru bankarstva, u obzir su uzete i odredbe Zakona o bankama Federacije BiH («Službene novine Federacije BiH», broj 39/98 i 32/00) i Zakona o bankama Republike Srpske («Službeni glasnik Republike Srpske», broj 44/03).

Konkurencijsko vijeće, u smislu člana 43. stav (7) Zakona, koristilo je sudsku praksu Evropskog suda i odluke Evropske komisije, kao i kriterije i standarde iz Uredbe Savjeta EK

broj 139/2004 o kontroli koncentracije između privrednih subjekata, Obavijest Evropske Komisije o konceptu koncentracije privrednih subjekata i Smjerenice za ocjenu horizontalnih koncentracija.

### **Pravni osnov i oblik koncentracije**

Pravni osnov predmetne koncentracije je Ugovor o kupovini akcija, zaključen dana 27. jula 2005. godine, kojim je 16.319 običnih akcija i 4.926 prioriternih akcija privrednog subjekta Razvojna banka a.d. Banja Luka ili 92,421% akcija od ukupnog broja akcija preuzeo privredni subjekt Nova Ljubljanska banka. Ovaj Ugovor je zaključen između Miroslava Michael Đorđević, državljanina Sjedinjenih Američkih Država, 8 Loch Haven Court, CA 94401 SAD, Milana Mandarića, državljanina Sjedinjenih Američkih Država, Fratton Park Frogmore Road, Portsmouth, Harts, PO 48 RA Velika Britanija, Biljane Čamilović, državljanke Srbije i Crne Gore, Takovska 6, 11000 Beograd, Srbija i Crna Gora (u daljem tekstu: Prodavci) i privrednog subjekta Nova Ljubljanska banka. Na ovaj način privredni subjekt Nova Ljubljanska banka od predmetnih Prodavaca je preuzeo 92,421% izdatog, uplaćenog i registrovanog kapitala.

Pravni oblik koncentracije je sticanje kontrole privrednog subjekta Nova Ljubljanska banka nad privrednim subjektom Razvojna banka, u smislu člana 12. Zakona, putem preuzimanja većinskog udjela u osnovnom kapitalu.

### **Učesnici koncentracije**

Privredni subjekt Nova Ljubljanska banka je osnovana kao dioničarsko društvo prema propisima Republike Slovenije i djeluje na tržištu univerzalnog bankarstva. Najveći dioničari su Republika Slovenija sa vlasničkim udjelom od 35,41% i KBC Bank N.V. Brussels koja ima u vlasništvu 34,0% akcija. Privredni subjekt Nova Ljubljanska banka djeluje neposredno u Republici Srbiji, Republici Crnoj Gori, Bosni i Hercegovini i drugim zemljama Evrope.

U finansijskoj 2004. godini, koja je prethodila predmetnoj transakciji, privredni subjekt Nova Ljubljanska banka je ostvarila ukupan prihod od 852.349.077,00 KM čime je ispunjen uslov iz člana 14. Zakona za Prijavu namjere koncentracije Konkurencijskom vijeću, u smislu člana 16. predmetnog Zakona.

Razvojna banka, akcionarsko društvo, je komercijalna banka osnovana je i djeluje prema propisima Bosne i Hercegovine, odnosno Republike Srpske, sa registrovanim akcijskim kapitalom od 22.987.000,00 KM, podjeljenim u 17.934 običnih akcija i 5.053 prioriternih akcija nominalne vrijednosti od 1.000,00 KM. Razvojna banka pruža usluge iz bankarskog sektora u Bosni i Hercegovini.

### **Analiza relevantnog tržišta**

U analizi relevantnog tržišta kroz utvrđivanje strukture relevantnog tržišta i tržišnih učesća učesnika koncentracije i konkurenata na relevantnom tržištu Konkurencijsko vijeće ocjenjuje dopuštenost predmetne koncentracije.

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu. Relevantno tržište usluga u konkretnom slučaju je tržište univerzalnog bankarstva što podrazumijeva pružanje bankarskih usluga maloprodajnog i korporacijskog bankarstva na cijeloj teritoriji Bosne i Hercegovine.

Budući da učesnici predmetne koncentracije djeluju posredno i neposredno na cijeloj teritoriji Bosne i Hercegovine relevantno tržište u geografskom smislu smatraće se cijela teritorija Bosne i Hercegovine.

Slijedom navedenog, pod relevantnim tržištem predmetne koncentracije podrazumijeva se pružanje usluga u segmentu univerzalnog bankarstva na cijeloj teritoriji Bosne i Hercegovine.

U analizi relevantnog tržišta učesnika predmetne koncentracije i procjenama tržišnih učešća, korišteni su podaci Agencije za bankarstvo Federacije Bosne i Hercegovine i Republike Srpske, podaci Konkurencijskog vijeće, kao i podaci dostavljeni od učesnika koncentracije.

Tržišno učešće vodećih banaka, u odnosu na ukupnu aktivnu u Bosni i Hercegovini, na dan 31. decembra 2004. godine (Tabela 1.):

Tabela 1.

R.b.	Naziv banke	Ukupna aktive (%)
1.	Raiffeisen banka	22,40%
2.	Hypo Alpe Adria Banka	11,70%
3.	UniCredit Zagrebačka banka	14,40%
4.	HVB Central Profit Banka	8,10%
5.	UPI banka	4,20%
6.	Volksbank BiH	3,50%
7.	<b>Razvojna banka Jugoistočne Evrope</b>	<b>3,20%</b>
8.	Tuzlanska banka	3,10%
9.	Nova Banjalučka banka	2,20%
10.	Nova banka	2,00%
11.	<b>CBS bank</b>	<b>1,80%</b>
12.	<b>LHB Banka</b>	<b>1,45%</b>
	Ostale banke	22,15%
	UKUPNO	100,00%
	<b>Ukupno učesnici koncentracije (7+11+12)</b>	<b>6,45%</b>

Tržišno učešće vodećih banaka, u odnosu na ukupnu aktivnu u Federaciji Bosne i Hercegovine, na dan 31. decembra 2004. godine (Tabela 2):

Tabela 2.

R.b.	Naziv banke	Ukupna vrijednost aktive (%)
1.	Raiffeisen banka	27,60%
2.	Hypo Alpe Adria Banka	14,40%
3.	UniCredit Zagrebačka banka	17,80%
4.	HVB Central Profit Banka	10,00%
5.	UPI banka	5,20%
6.	Volksbank BiH	4,30%
7.	Tuzlanska banka	3,80%
8.	CBS bank	2,30%
	Ostale banke	14,60%
	UKUPNO	100,00%

Tržišno učešće vodećih banaka, u odnosu na ukupnu aktivnu u Republici Srpskoj, na dan 31. decembra 2004. godine (Tabela 3):

Tabela 3.

R.b.	Naziv banke	Ukupna aktiva	
		Iznos KM (000)	(%)
1.	Hypo Alpe Adria Banka	564.943,00	34,21%
2.	<b>Razvojna banka Jugoistočne Evrope</b>	<b>290.050,00</b>	<b>17,56%</b>
3.	Nova Banjalučka banka	193.249,00	11,70%
4.	Zepter banka	169.343,00	10,25%
5.	Nova banka	159.416,00	9,65%
6.	<b>LHB Banka</b>	<b>132.046,00</b>	<b>8,00%</b>
7.	Pavlovic International Bank	59.642,00	3,61%
8.	Ostale banke	259.602,00	15,72%
	UKUPNO	1.651.412,00	100,00%
	<b>Ukupno učesnici koncentracije (2+6)</b>	<b>422.096,00</b>	<b>25,56%</b>

Prema tabelama 1.- 3. ukupno tržišno učešće učesnika koncentracije u segmentu aktive na nivou Bosne i Hercegovine je 6,45%, dok je u Republici Srpskoj 25,56%. Prema ovim podacima najveće ostvareno tržišno učešće u aktivi na nivou Bosne i Hercegovine ima privredni subjekt Raiffeisen banka sa 22,40%, dok u Republici Srpskoj ima privredni subjekt Hypo Alpe Adria Banka sa 34,21%.

### Maloprodajno bankarstva

Bankarske usluge za stanovništvo (maloprodajno bankarstvo) obuhvataju proizvode kao što su depoziti i računi (tekući računi, štedni računi, novčani depoziti i čekovi itd), usluge novčanih transakcija uključujući i bankomate, izdavanje platežnih kartica, transfer kredita, direktna zaduženja, dospjeće naloga i čekova, itd.

Struktura učešća banaka na tržištu maloprodajnog bankarstva (privatni depoziti i krediti) u Republici Srpskoj na dan 31.12.2004. godine (Tabela 4.)

Tabela 4.

000 KM		Republika Srpska					
R.b	Naziv banke	Privatni depoziti		Privatni krediti		Ukupno/ prosjek	
		Iznos KM	%	Iznos KM	%	Iznos KM	%
1.	Hypo Alpe Adria Bank	79.361,00	21,22%	235.677,00	53,67%	315.038,00	38,75%
2.	<b>Razvojna banka Jugoistočne Evrope</b>	<b>91.607,00</b>	<b>24,50%</b>	<b>59.429,00</b>	<b>13,53%</b>	<b>151.036,00</b>	<b>18,58%</b>
3.	Zepter banka	68.717,00	18,37%	23.145,00	5,27%	91.862,00	11,30%
4.	Nova Banjalučka banka	46.094,00	12,32%	33.839,00	7,71%	79.933,00	9,83%
5.	Nova banka	30.779,00	8,23%	40.707,00	0,93%	71.486,00	8,79%
6.	<b>LHB banka</b>	<b>27.181,00</b>	<b>7,27%</b>	<b>29.806,00</b>	<b>6,79%</b>	<b>56.987,00</b>	<b>7,00%</b>
7.	Pavlovic International Bank	18.440,00	4,93%	8.832,00	2,01%	27.272,00	3,35%
8.	Bobar banka	8.020,00	2,14%	5.878,00	1,34%	13.898,00	1,71%
9.	Balkan Investment Bank	3.793,00	1,01%	1.777,00	0,40%	5.570,00	0,68%
	Ukupno	373.992,00	100,0%	439.090,00	100,0%	813.082,00	100,0%
	<b>Ukupno učesnici koncentracije (2+6)</b>	<b>118.788,00</b>	<b>31,77%</b>	<b>89.235,00</b>	<b>20,32%</b>	<b>208.023,00</b>	<b>25,58%</b>

Prema tabeli 4. najveće ostvareno tržišno učešće u maloprodajnom bankarstvu (u prosjeku) u Republici Srpskoj je imao privredni subjekt Hypo Alpe Adria Bank - Banja Luka sa 38,75%, dok je tržišno učešće učesnika koncentracije u maloprodajnom bankarstvu u prosjeku 25,58% (u oblasti privatnih depozita i 31,77% i u oblasti privatnih kredita, 20,32%) tržišnog učešća ukupnog maloprodajnog bankarstva u Republici Srpskoj.

### Korporativno bankarstvo

Korporativno bankarstvo obuhvata širok djelokrug bankarskih usluga koje se generalno nude korporativnim klijentima. U ovu skupinu usluga uključuju se depoziti, krediti, novčane transakcije, kreditna pisma, međunarodne isplate itd.

Struktura pojedinačnih tržišnih učešća učesnika koncentracije i glavnih konkurenata na tržištu korporativnog bankarstva Republike Srpske (depoziti i krediti) na dan 31.12.2004. godine (Tabela 5).

Tabela 5.

000 KM		Republika Srpska					
Rb	Naziv banke	Korporativni depoziti		Korporativni krediti		Ukupno /prosjek	
		Iznos KM	%	Iznos KM	%	Iznos KM	%
1.	Hypo Alpe Adria Bank	57.257,00	10,97%	200.275,00	34,0%	257.532,00	23,17%
2.	<b>Razvojna banka Jugoistočne Evrope</b>	<b>145.198,00</b>	<b>27,80%</b>	<b>83.113,00</b>	<b>14,11%</b>	<b>228.311,00</b>	<b>20,55%</b>

3.	Nova Banjalučka banka	89.452,00	17,12%	81.841,00	13,90%	171.293,00	15,14%
4.	Nova banka	84.462,00	16,17%	69.421,00	11,79%	153.883,00	13,85%
5.	Zepter banka	52.915,00	10,13%	59.940,00	10,18%	112.855,00	10,16%
<b>6.</b>	<b>LHB banka</b>	<b>50.857,00</b>	<b>9,74%</b>	<b>41.356,00</b>	<b>7,02%</b>	<b>92.213,00</b>	<b>8,30%</b>
7.	Pavlovic International Bank	19.937,00	3,82%	22.152,00	3,76%	42.089,00	3,79%
8.	Balkan Investment Bank	11.541,00	2,21%	23.077,00	3,92%	34.618,00	3,12%
9.	Bobar banka	10.763,00	2,06%	7.712,00	1,31%	18.475,00	1,66%
	Ukupno	522.382,00	100,0%	588.887,00	100,0%	1.111.269,00	100,0%
	<b>Ukupno (2+6) zajednička tržišna učešća učesnika</b>	<b>196.055,00</b>	<b>37,54%</b>	<b>124.469,00</b>	<b>21,13%</b>	<b>320.524,00</b>	<b>28,85%</b>

Zajedničko tržišno učešće učesnika koncentracije u oblasti korporativnog bankarstva u Republici Srpskoj na dan 31.12.2004. godine u prosjeku je bilo 28,85% (u oblasti korporativnih depozita 37,54%, dok je u oblasti korporativnih kredita 21,13%) tržišnog učešća ukupnog korporativnog bankarstva u Republici Srpskoj.

### Poslovna mreža

U strukturi poslovne mreže učesnici koncentracije imaju ukupno 64 organizacione jedinice u Bosni i Hercegovini na dan 31.12.2004. godine. Od toga 63 (agencija, filijala ekspozitura) djeluju u Republici Srpskoj što predstavlja oko 29% od ukupnog broja.

### Tržišno učešće NLB Group u Bosni i Hercegovini

U cilju kompletne analize relevantnog tržišta, za period do 31. decembra 2005. godine, pored privrednih subjekata, učesnika predmetne koncentracije, obračunati su i tržišni udjeli u aktivni, kao i na tržištu univerzalnog bankarstva Bosne i Hercegovine za sva povezana privredna društva sa učesnicima predmetne koncentracije u Bosni i Hercegovini. Ovo se odnosi na privredni subjekt Tuzlanska banka d.d. i privredni subjekt CBS Bank d.d. Sarajevo, koji su u sastavu NLB Group–Ljubljana, Republika Slovenije (Tabela 6.).

Tabela 6.

31.12.2005. Naziv banke		Bosna i Hercegovina		
		Ukupna aktiva	Maloprodajno bankarstvo	Korporativno bankarstvo
Federacija BiH	Tuzlanska banka d.d. i	4,60%	3,80%	6,10%
	CBS Bank d.d. Sarajevo			
Republika Srpska	LHB Banka a.d. Banja Luka	4,40%	2,10%	2,00%
	Razvojna banka a.d. Banja Luka			
<b>UKUPNO NLB Group Ljubljana</b>		<b>9,00%</b>	<b>5,90%</b>	<b>8,10%</b>

### Procjena koncentracije

Konkurencijsko vijeće je nakon procjene i analize podataka i činjenica u postupku donošenja predmetnog Rješenja, procjenjujući sve činjenice kako pojedinačne tako i međusobno povezane, utvrdilo da koncentracija predmetnih privrednih subjekata ne sprečava, ograničava ili narušava tržišnu konkurenciju na relevantnom tržištu, već ista osigurava pojačanu tržišnu konkurenciju u oblasti pružanja bankarskih usluga u Bosni i Hercegovini.

Pri donošenju ove odluke Konkurencijsko vijeće posebno je imalo u vidu da ova koncentracija nije značajno povećala tržišna učešća učesnika koncentracije na relevantnom tržištu bankarskih usluga (Tabele 1.-6.), odnosno da zajednička tržišna učešća privrednog subjekta Nova Ljubljanska banka u bankarskoj aktivni Bosne i Hercegovine iznosi 9,0%, u maloprodajnom bankarstvu 5,9%, dok je u korporativnom bankarstvu 8,1%.

Slijedom navedenog, Konkurencijsko vijeće je ocijenilo predmetnu koncentraciju dopuštenom u smislu člana 18. stav (2) Zakona, i odlučio kao u dispozitivu ovog Rješenja.

### **Novčana kazna**

Na osnovu člana 14. stav (1) tačka a) Zakona, Prijavu namjere koncentracije privredni subjekti učesnici koncentracije su obavezni podnijeti Konkurencijskom vijeću ako ukupni godišnji prihod učesnika koncentracije ostvaren od bankarskih usluga na svjetskom tržištu iznosi preko 100.000.000,00 KM.

Ako su ispunjeni uslovi iz člana 14. Zakona, Prijava namjere koncentracije se podnosi Konkurencijskom vijeću na ocjenu u roku od osam dana od dana objave javne ponude ili sklapanja ugovora kojima se ostvaruje kontrola ili prevladavajući uticaj nad privrednim subjektom, zavisno od toga šta nastupi ranije, u skladu sa članom 16. stav (1) Zakona.

Imajući u vidu navedene odredbe Zakona i nakon uvida u dostavljenu dokumentaciju Konkurencijsko vijeće je utvrdilo da privredni subjekt Nova Ljubljanska banka nije prijavila predmetnu koncentraciju iako ispunjava uslove iz člana 12. Zakona (sticanje preko 50% udjela u dioničkom kapitalu Razvojne banke), kao i člana 14. stav (1) tačka a) Zakona (ukupan ostvareni godišnji prihod na dan 31. decembra 2004. godine). Na osnovu navedenog privredni subjekt Nova Ljubljanska banka je bila obavezna prijaviti koncentraciju Konkurencijskom vijeću, u smislu člana 16. stav (1) Zakona.

Konkurencijsko vijeće je uzimajući u obzir sve relevantne okolnosti i činjenice utvrdilo postojanje povrede, u smislu člana 16. ovog Zakona, i radi toga može izreći novčanu kaznu do 1% od ukupnog prihoda iz predhodne godine poslovanja, u smislu člana 49. stav (1) tačka b) Zakona,

Konkurencijsko vijeće je izreklo novčanu kaznu privrednom subjektu Nova Ljubljanska banka u iznosu od 400.000,00 KM, što predstavlja oko 0,05% od ukupnog godišnjeg prihoda iz 2004. godine.

Prilikom određivanja visine novčane kazne Konkurencijsko vijeće je imalo u vidu da je Zaključak o pokretanju postupka po službenoj dužnosti Konkurencijsko vijeće je donijelo dana 26.10.2006. godine, odnosno petnaest mjeseci od dana zaključivanja Ugovora o kupovini akcija (zaključen dana 27. jula 2005. godine), između učesnika predmetne koncentracije, a da privredni subjekt Nova Ljubljanska banka u tom periodu nije podnio naknadnu Prijavu namjere predmetne koncentracije.

Konkurencijsko vijeće je odredilo visinu novčane kazne imajući u vidu činjenicu da kažnjavanje privrednog subjekta Nova Ljubljanska banka nije prvenstveno cilj, već izrečena novčana kazna ima namjeru upozoriti na obavezu primjene Zakona o konkurenciji.

Pored navedenog, Konkurencijsko vijeće je imalo u vidu i činjenicu da privredni subjekt Nova Ljubljanska banka djeluje u zemlji u kojoj je razvijena konkurencijska praksa i gdje se primjenjuju slične sankcije za ovakva kršenja pravila konkurencije, te je morala biti upoznata sa zakonodavstvom zemlje u kojoj se provodi koncentracija.

Konkurencijsko vijeće je prilikom određivanja visine novčane kazne uzelo u obzir i potpunu saradnju privrednog subjekta Nova Ljubljanska banka tokom cijelog postupka.



Navodi izneseni u odgovoru na zaključak o pokretanju postupka u pogledu oslobađanja od kazne, u smislu člana 3. stav (2) Odluke o proceduri oslobađanja odnosno ublažavanja kazne nisu mogli uticati na izricanje visine kazne iz razloga što se predmetna Odluka odnosi samo na kartele a ne koncentracije.

**Pouka o pravnom lijeku**

Ovo Rješenje je konačno i protiv istog nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovoga Rješenja.

**Gordan Raspudić**

**Predsjednik**